

TE HEEHOURAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa.
Te hoo-e piti farane i te matahiti hoé.

Nu. 2.

Febuare 1926.

Mat. 20.

*Aore hoi au i haama i te evanelia o te Mesia ra, no te
mea, o te mana ia o te Atua, ia ora te feia atoa i faaroo ra;
te ati Iuda na e te Heleni atoa hoi. (Roma 1:15.)*

Te Evanelia Mure Ore

I te matahiti iva ahuru ma ono ia, tei nia te aposetolo o Ioane,
i te fenua o Patamo. Ua haapaohia taua fenua ra ei vahi
tapearaa taata, e ua rave hoi o Ioane i te ohipa i roto i te mau
vahitapuraa ofai. O Ioane nei ra o te taata ia oia i parauhia
o Ioane pipi here. O oia ia te toea o te mau aposetolo ta
Iesu iho i maiti a ora ai oia i roto i te tino nei.

Ua rave maitai te mau aposetolo i te mau ohipa ta Iesu
i faaue ia ratou ia rave, e i roto i na matahiti e pae ahuru,
ua hope te mau fenua i Europa ma i te haerehia e ratou i te
poro-haere-raa i te mau parau ta Iesu i faaue ia ratou ia aó
atu. E i te hopea ra ua horoa noa ratou i to ratou iho mau ora
no te ohipa tei horoahia mai na ratou e rave, maoti râ, te hoé,
o Ioane pipi here, e ua vaiiuhohia oia i nia iho i te fenua ia
tupu te parau ta te Mesia i parau ia'na, oia hoi, e faaea oia
i nia iho i te fenua nei e tae noa'tu i te taime e hoí faahou

mai o Iesu.

Te haapii mai nei te mau heheuraa e, te ora noa nei a o Ioane i muri a'é i te poheraa o to'na mau taeae aposetolo, e ua rave oia i ra hoé mau ohipa maitai no te Evamelia a Iesu. Ua tamata te tahi mau taata e taparahi ia'na e ua taorahia atura oia i roto i te hoé farii rahi tei i te hinu pihaa, e ua ora atura oia, e i reira ua afaihia oia i nia i te fenua o Patamo e ua iriti aéra te Atua i te mau paruru o te raí ra e ua itea ia'na te tahi mau orama hanahana rahi. Ua na ô o Ioane i te parau i roto i te pene hoé ahuru ma maha e i te irava ono e te vau e te pene hoé ahuru ma vau e te iraaa maha e te pae:

“Hió atura vau i te hoé melahi i te mauêraa na ropu i te reva nei: ma te evanelia e tia i te vairaa ra ei pororaa'tu i te feia e parahi i te ao nei ra, i te mau fenua atoa, e te mau opu atoa, e te mau reo atoa, e te mau nunaa atoa,

“I te pii-hua-raa te reo e, A mataú i te Atua e faahana-hana'tu ia'na: ua tae hoi te hora faantuaraa na'na ra: e haamori outou ia'na i tei hamani i te ra'i, e te fenua, e te tai, e te mau pape pihaa ra.

“Ua pee mai te tahi melahi i muri iho, i te na ôraa e, Ua mairi e, ua mairi taua oire rahi ra o Babulonia no te mea ua faainu oia i te mau fenua atoa i te uaina ra i te riri o ta'na ra faaturi.

“I te atura vau i te hoé rea no te raí mai á, i te na ôraa mai e, A haere ê mai na outou i rapae, e au mau taata e, ia ore outou ia riro ei rave atoa i ta'na mau hara, ia ore outou ia pohe atoa i to'na ra mau pehe.

“Ua taea hoi te ra'i i ta'na ra mau hara, e ua manaó te Atua i ta'na mau parau-tia ore.”

Ua parau atoa mai o Ioane i te parau no te tia-faahou-raa matamua e te tia-faahou-raa piti. Te hoi ia ta'na parau:

“I te atura hoi au i te hoé terono rahi teatea, e tei parahi i nia i hora, pee ê atura hoi e te fenua te raí i to'na

mata, e aita'tura o raua e vairaa itea.

“E ite atura hoi au i teipohe ra, o te taata rii, e te feia rarahi i te tiaraa i mua i te Atua ra; e hena ihora na buka ra: e heua ihora hoi te tahi buka, oia te buka ora ra: e haavâhia ihora taua feia i pohe ra i te mau parau i papaihia i roto i taua na buka ra, i ta ratou ra mau ohipa.

“E ua tuu mairate miti i te feia i pohe i roto ia'na ra, e ua tuu maira te apoo e hade i te feia i pohe i roto ia raua ra, e haavâhia ihora ratou i ta ratou mau ohipa.” (Apok. 20: 11-13.)

Te faaroo nei to te Ekalesia a Iesu Mesia i te Feia Moá i te Mau Mahana Hopea Nei e, O taua Ekalesia ra o te tupuraa ia o teie nei mau parau ûrûhia a Ioane. E ere te Evanelia ta matou e haapii nei i te hoé Evanelia apî, o te Evanelia mau â ia ta Iesu e ta'na mau pîpî i aó atu i to ratou ra anotau. E te faaroo nei hoi matou e, ua rave-ê-hia'tu te Evanelia i muri aé i te Mesia no te parau-tia-ore o te mau taata; e i roto i teie nei anotau râ ua faahoí-faahou-hia mai taua Evanelia tahito ra, e ua horoahia mai te mana no te aóraa i te reira.

Ua haamanuhia te tumu o te Evanelia ta matou e haapii nei i te ao varua ra, hou teie nei ao i hamanihia'i, e ua horoahia mai teie nei Evanelia i te taata nei na roto i te tahi mau tuuraa, e ua tuati hoi te tahi tau tuuraa Evanelia i te tahi mai te matamua mai e tae roa mai i teie nei â. I muri aé i to Adamu raua o Eva tiavaru-raa-hia i rapaeau i te ô Edené ra, ua horoahia mai te Evanelia ia Adamu, e ua parau mai hoi te Atua ia Adamu i reira e, “E vai â teie nei Evanelia i nia iho i te fenua nei mai te matamua e tae noa'tu i te hopea” e te faaroo nei matou e, o teie nei tau tuuraa Evanelia ra, o te tau tuuraa Evanelia ia i te hoperaa te mau tau ra.

Tera ia te tumu rahi i faahoíhia mai ai te Evanelia i teie nei anotau hopea nei no te haaputuputuraa ia i te mau

ati Iseraela tei haapurarahia ra, e te faariroraa i te mau mea atoa ei hoé i te Mesia ra.

Ia haaputuputuhia Iseraela e tia'i, no te mea e tae mai te Atua no Iseralea ei Arii no ratou. E o ratou ia te mau taata tei faataa-ê-hia na ei farii ia'na. E na roto i te utua-fare o Iseraela e haamaitai ai te Atua i te mau nunaa atoa o te ao nei, mai tei au i ta'na parau ia Aberahama. E na mua Iesu Mesia i te tae mai i Ziona apî, te faatiahia i nia iho i te fenua Amerika; e e haaputuputu atu te mau ati Iseraela i taua oire ra e farerei i to ratou Arii, maoti râ te ati no Iuda, e e haaputuputu atu ratou i to ratou iho fenua, oia hoi, i Ierusalema, e e faaapî ratou i taua oire tahito ra. E i teie nei â mahana te hoî nei te mau ati Iuda i to ratou iho fenua.

Te faaroo nei maton e, te rahiraa o te mau Feia Moá i te Mau Mahana Hopea Nei, no te utua-fare o Iseraela ratou, na roto ia Iosepha o tei hoohia'tu i to Aiphti i tahito ê ra, na roto i to'na tamaiti ia Epheraima. Ua ua tohu-ê-hia na e te peropheta ra o Isaia e, "Na te ati o Epheraima e haamata i te ohipa haaputuputuraa i te mau mohana hopea. (Isaia - 11:12.) E huaai mau o Iosepha Semita o tei haamau i te Ekalesia a Iesu Mesia i te Feia Moá i te Mau Mahana Hopea Nei na roto i te mana o te Atua i teie nei mau mahana hopea, na Epheraima. E ua maiti-mau-hia oia e te Atua iho no te haamataraa i te ohipa haaputuputuraa i teie nei tau hopea nei.

Ia tae mai to tatou Faaora ra, e haamata ai te tau i parauhia te Melenima, oia hoi, na matahiti e hoé tauatini no te hau e te peapea ore. E e ruuruuhia o Satani, e e ore roa to'na mana i nia i aau o te mau taata.

E ui mai paha te tahi mau taata e, "Nahea outou i ite ai e, e tupu teie nei mau mea nei?" Tera ia te pahonoraa, na roto i te heheuraa tahito e te heheuraa apî hoi, no ô mai i te Atua ra.

Ua itea ia Ioane te hoé buka tei taatihia i na taati e hitu ra, e aita roa i nehenehe i te hoé taata ia ofati i taua na tapao e hitu ra maoti râ te Tamaiti a te Atua. Ia'na i ofati te taati matamua ra ua tupu te tahi mau mea, e hoé ahuru te piti e tae noa'tu i te hitu o te taati.

Ua haapii mai o Iosepha Semita i roto i to'na ra mau mahana e, "Te vai nei i roto i taua buka ra, te mau hinaaro, e te mau ohipa e te mau mea omoe na te Atua no teie nei ao i roto i na tauatini matahiti e hitu ra, a vai tahuti noa ai te ao nei. "Tei roto i te taati matamua te mau mea o hoé o te tauatini matahiti, e tei roto i te piti te mau mea no te piti o te tauatini matahiti, e na reira noa e tae noa'tu i te hitu o te taati e te hitu hoi o te tauatini matahiti. "Ua haapii atoa mai oia e, ei reira hoi e faaotohia ai te mau pû o na melahi e hitu mai te faaitohia mai e Ioane ra, e o te faaineineraa e te faaotiraa ia i ta te Atua mau ohipa e te haamataraa o te hitu o te tauatini matahiti, e o te faatitiaifaroraa e te faaineineraa hoi ia i te eá no te tae faahou-raa mai o to tatou Fatu o Iesu Mesia."

Te na tauatini matahiti i parauhia nei ra, o te maororaa ia o te taime i horoahia mai i te ao nei ei rave i ta'na mau ohipa. Oia hoi e rave i te ohipa i roto i na tauatini matahiti e ono e i te hitu o te tauatini matahiti ra, e faaea hoi ia oia i ta'na mau ohipa, e ua parauhia hoi taua tau ra i te Meleniuma.

Ua haapii mai te peropheta o Iosepha Semita e, "O to te Atua mahana ra, hoé ia tauatini o to tatou matahiti nei. "Ua faaite maira te Atua ia Aberahama e, hoé â to te ao ra o Koloba taióraa i te mau taime e te mau tau e to'na iho; oia hoi, hoé huriraa te ao Koloba, hoé ia mahana i te Atua, e hoé ia tauatini matahiti mai tei i te taióraa taime o to tatou ao nei. Na ô atura te Atua ia Adamu, "ei te mahana e amu ai oe i te reira e pohe ia oe area râ e 930 to

Adamu matahiti i pohe ai oia ra. "Ua na ô maira Aberahama na taua parau a te Atua ia Adamu ra, "Ua ite hoi au e, o to te Atua ia mahana i parauhia, oia hoi, o te taiôraa taimé na te ao ra o Koloba, no te mea e, aore â te Atua i tuu mai ia Adamu i to'na iho tai'oraa tau." (Buka poe Taôá Rahi Aberahama 3; e te 5:13.) Ua na ô mai hoi te Aposetolo o Petero: "Eiaha na ia moe ia outou teie nei parau iti, e au mau here e, hoé â hete i te Fatu te mahana hoé e te matahiti hoé tauatini ra: e te matahiti hoé tauatini ra, hoé â hete e te mahana hoé." (IIPetero 3:8.)

"Mai te au feruriraa o te feia paari i roto i te ao nei e toratou taiôraa taimé, e mai te au hoi i te mau heheuraa a te Atua, te mairi nei hoi te ono o te mahana. E maha ia mahana, oia hoi, e maha tauatini matahiti i mairi i fanau mai ai Iesu Mesia ra, e ua fatata hoi e piti tauatini matahiti faahou i pau mai to te Fatu taeraa mai i te ao nei e teie nei tau; no reira tei ahiahi roa tatou o te mahana maa tatou no to tatou nei oraraa"

"E ia tae mai te hitu o te mahana, oia hoi te hitu o te tauatini o te matahiti ra, o te Sabati o te ao nei, oia hoi, to'na mahana faaearaa. E hoé ia tauatini matahiti no te hau e te peapea ore, e ruuruhia'i o Satanira, e e parauhia hoi te reira, te Meleniuma."

Ua fatata roa te hora faantuaraa na te Atua, eiaha outou e maere i taua parau ra, a taio ra outou i te mau tapao, oia hoi, te mau tamaí, te mau aueneraa fenua i tera vahi e i tera vahi, te mau mai ino e te mau miti rahi, na te reira mau mea e faaite mau ia tatou e, ua fatata roa te mahana e tae faahou mai ai to tatou Faaora. Ia faaorehia te mau ino e te mau mea viivii i roto i te ao nei e tia'i, e ia faaineinehia te ao nei no To'na haereraa piti mai, e te faaorehia nei tana mau ino ra na roto i te mau aueneraa fenua e te mau tamaí e te mau mea i faaitchia i roto i te

Mataio i te pene 24. No te Atua teie nei, e te vai ra te mahana e haere tino mai ai oia i ônei, no reira ia tamahia e tia'i, ia riro te reira ei vahi parabiraa no'na.

Ua haapii pâpû mai te parau a Ioane e, e haavâhia te mau taata i te mau ohipa ta ratou i rave a ora noa ai ratou i roto i teie nei ao, oia hoi, mai te mea ua rave ratou i te ohipa maitai ra, e roaa ia ratou te utua maitai, e mai te mea râ ua rave ratou i te ohipa ino ra, e roaa ihoâ ia ratou te utua ino mai tei au i ta ratou mau ohipa ino. I te tau no Iosepha Semita te haapii ra te mau haapaoraa e, na faataa-ê-hia na te mau taata hou ratou i tae mai ai i roto i teie nei ao, no te maitai e aore râ te ino, e ia tae mai ratou i ô nei, e rave ratou i te mea tei faataahia na ratou e rave, e aita atu e ravea, maoti râ ia rave ratou i taua ohipa ra. E te mau aiû aruaru ra o tei ore i baptizoha ra, e haere ratou i te vahi mauini mure ore.

Ua haapii mai te peropheta e, "na te taata taua mau haapiiraa ra, e ere no ô i te Atua taua mau huru haapiiraa. Aita roa tatou i faataa hia no te tahi mau mea e no te tahi mau mea, maoti râ, ua horoahia mai te tiamâ ia tatou e e tia'i ia tatou ia rave i te mea ta tatou e hinaaro, e mai te mea e hinaaro tatou i te ora ra, ia haapao tatou i te mau ture o te Evanelia e tia'i. Area râ mai te mea aita tatou e hinaaro i te ora ra, eiaha tatou e haapao i taua mau ture no te Evanelia ra. E te mau aiû aruaru ra, e mea tia anei ia baptizohia ratou? Tera ia te pahonoraa e au ai: Aita, no te mea aita ta ratou e hara, e tera hoi ia te tumu mau no te baptizoraa, oia hoi, ia matara te hara. Ua mâ te hara tumu na rotou i te taraehara o to tatou Faaora. "Mai te taata e hope i te pohe ia Adamu e hope atoa i te faaorahia i te Mesia." (IKor. 15:22.)

Area râ te feia paari ra, e mea huru ê rii to ratou huru i to te aiû. Ua tae ratou i te vahi i te ai ratou i te maitai

e te ino, e ua hara ratou, e no reira ia haapao ratou i te mau ture e te mau faaueraa no te Evanelia e tia'i, oia hoi, ia faaroo ratou i te Atua, e ia Iesu Mesia, e ia tatarahapa i ta ratou mau hara, e ia baptizohia ratou i raro i te pape ia matarahia ta ratou mau hara, e ia tunhia te rima o te feia mana i nia iho ia ratou no te fariiraa i te Varua Maitai. E o ratou o tei pohe ra e o tei ore i faaroo i te Evanelia a ora noa ai ratou i roto i teie nei ao, e faaroo atoa ratou i te Evanelia e e roaa hoi ia ratou te ravea e farii ai i te reira. "I parau-atoa-hia'tu ai hoi te evanelia i te feia i pohe ra, i faahapa-hia'tu ai ratou e te taata i te tino ra, te ora ra râ ratou i te Atua i te Varua ra." (I Petero 4:6.)

I to Iosepha Samita anotan, ua maere te mau taata i ta'na mau haapiiraa, e ua parau maira ratou e, "E haapiiraa apî teie ta'na e haapii mai nei." E ere roa ia i te Evanelia apî ta'na i aó atu ia ratou ra. O te mau haapiiraa mau ia ta Iesu iho i haapii i to'na ra anotan. Hoé ahuru i to Iesu anotan ra, ua maere te mau taata i ta'na mau haapiiraa, e aita te tahi paeau i farii.

Ua haapii mai o Iesu e, "E rave rahi te parahiraa mau i te fare o tau Metua ra; ahiri aita ra, ua parau atu ia vau ia outou. Te haere nei au e haamaitai i te hoé vahi no outou." (Ioane 14:2.) E ua parau hoi Iesu i teie mau parau i ta'na mau aposetolo o tei faaroo e tei tatarahapa, e tei baptizohia i roto i te pape e tei farii hoi i te horoaraa o te Varua Maitai ra. E te vahi ta'na i parau ra, o te hoé noa iho ia fare o te mau fare o ta'na Metua ra.

Ua faatumuhia te faaoraraa i nia i te tatarahapa. E e nehenehe i te feia i pohe ra ia tatarahapa. Area râ mai te mea aita e nehenehe i te taata ia tatarahapa ra, eita ihoâ e noaa ia'na te ora. O ratou hoi ia o tei farii i te ite pâpû no te Evanelia e i muri aê râ e faaino i te Varua Maitai, na roto i te hunaraa i te reira, e aore râ na roto i te taparahiraa i te taata mai te tumu ore.

Aita roa matou i haama i teie nei mau haapiiraa, no te mea na te Atua i horoa mai. E te faaite atu nei matou i to te ao atoa nei e, ua faahoí-faahou-hia mai te Evanelia mau i te taata nei, oia ia te Evanelia o tei rave ê-hia'tu no nia atu i te fenua nei i muri aé i to tatou Faaora ia Iesu Mesia. E te faaite atu nei hoi matou, e, ua horoahia mai te mana no te poro-haere-raa i taua Evanelia hanahana ra i to te ao atoa nei. E te ani atu nei matou ia outou ia farii i teie nei mau haapiiraa na Iesu Mesia, e a haapao hoi, e ua pâpûroa te mea e roaa mai, oia hoi, te ora mure ore.

—Hebera Foutera



IESU MESIA

Te Mau Parau Apî

Ua tupuhia te hoé taata Amerika i te tahi maí huru ê, e ua parauhia taua maí ra, "Te Maí Taoto." Ua taoto noa oia no na mahana e 10, a pohe atu ai oia ra.

Ua itea aénei te oivi o te hoé taata tei parahi i te fenua Aiphiti i tahito ê ra, o Tutankhamen to'na i'oa. E tei roto atoa i to'na menema te tahi mau oé auro, e te tahi mau ohipa huru ê no te mau tau tahito.

I te fenua Amerika i roto avae Tenuare i mairi aénei, a maué ai na raatira e toopiti no te hau Amerika na nia i to raua pahi reva, ua tupu te ino i te matini, e ua topa ihora e piti tauatini avae i raro, e ua pohe roa atura raua e toopiti atoa. e ua mou roa te pahe reva.

I te fenua Amerika i roto i te avae i mairi aénei, a vavahi ai te tahi mau taata rave ohipa i te hoé fare tahito ua topa mai te tahi tufaa no te tahua toru i nia ia ratou e ua mau ihora ratou i raro aé i te reira, e tera ia te teiaha no taua tahua ra, oia hoi e 25 tane, e ua ora atura ratou atoa.

Ua tupu te hoé aueueraa fenua i te fenua Itaria i roto i te avae Tenuare i mairi aénei. I roto i te oire o Venice ua mou roa te tahi mau fare, e e rave rahi te taata i pohe. E i roto hoi i te oire Siena i te fenua Itaria, ua mou roa e hitu hanere fare, e ua horo te mau taata no taua oire ra i rapaeau, e e rave rahi hoi te pohe i reira.

Ua tupu aénei te hoé vero rahi i fatata i te fenua Icel-
and, e ua tomo roa te pahi auahi, o Hartwick, e ua pohe te
mau taata atoa i nia iho.

I te 6 no Tenuare i mairi aénei ua tupu te hoé aueueraa
fenua i roto i te oire San Francisco, e ere râ ia i te mea
puai roa. Aita e taata i pohe, e aita hoi te mau fare i mou.

Ua tupu te hoé orure hau i te fenua Mexico i roto i te
avae Tenuare i mairi aénei e ua tonohia te hoé nuu no te
Hau Mexico e tamata i te faaore i taua orure hau ra.

I te fenua Amerika i roto i te avae i mairi aénei, a tere
ai te hoé pareoo niuniu na nia i te hoé eá turu, e ua ino te
eá turu ra, e ua topa te pereoo niuniu i roto i te anavai, e
ua pohe e 5 taata.

Ua tupu te peapea i ropu i te hoé taata Amerika e ta'na
vahine, e ua faatia'tu oia te hinaaro o ta'na vahine o tei
hinaaro e taa i ta'na tane, e i muri iho i te haereraa'tu o
taua vahine ra e ua pupuhi ihora taua taata ra ia'na iho.

I te fenua Iapone i roto i te avae Tenuare i mairi aénei,
ua tere te hoé pereoo auahi na nia i to'na eá tei haere roa
atu i nia i te mouá, e ua huru ino te eá, e ua topa ihora te
pereoo auahi e 200 avae i roto i te hoá faa, e ua pohe roa e
12 taata.

Ua tupu te hoé aueneraa fenua i te mau fenua moana o Phillippines, e ua mou te tahi na oire maohi.

I te fenua Amerika i roto i te avae Tenuare i mairi aénei, ua tupu te hoé ati mataí rahi roa, e ua mou roa te tahi mau oire, e ua pohe e toru taata, e rave rahi tei pêpê.

I te fenua Amerika i roto i te avae i mairi aénei, te hauti ra te tahi mau tamarii i te mati, e ua paapaa roa ratou, e ua pohe roa e toru, e ua manaóhia e, e pohe atoa te tahi.

I te fenua Amerika i roto i te avae Tenuare i mairi aénei, ua tupu i te auahi i roto i te hoé fare, e tei roto atoa i taua fare ra, te hoé vahine e na tamarii e tootoru no'na ra, e ua paapaa roa'tura te fare e ratou atoa i te auahi.

I te fenua Canada i roto i te avae Tenuare i mairi aénei, ua tupu te auahi i roto i te hoé fare tipaeraa, e ua mou roa'tura, e tera ia te rahiraa o te moni i mauáhia, oia hoi, e pití mirioni dala moni Amerika.

I roto i te oire Charleston, i te fenua Amerika i roto i te avae Tenuare i mairi aénei, ua pohe e piti taata ereere tei tae i te hanere o to raua matahiti. O J. C. James te i'oa o te hoé, e 102 to'na matahiti, o Thomas Epps te i'oa no te tahi, e e 105 to'na matahiti.

O. B. Peterson, Imprimeur,

Rue Brea et de la rue Dumont d'Urville, Orovini, Papeete